

平平無寬者故為平也是故德君以治太平之氣立來也以然者乃天下無自寬者各自得其所樂所以勅真人以付上德之君者上德之君其用心必仁賢而明明者不奪人所欲必得天下之心欲承天意以道歸之也真人知之耶唯唯

署置官得失訣第一百六十一

行且重戒真人一言使其有似天行也天之為行不奪人所欲為也地之為行亦不奪人所欲為也明君之為行亦樂象天地不奪人所為也與天地相似故能獨長稱天地得其心也子知之耶唯唯夫天且為惡其歲且大凶者常害人所為故民無可收也其歲凶飢寒也是故地將為惡也傷人所養其根不固而有病也其歲不成多傷民困窮也衰惡之君將凶署置不以其人所任職名為故亂天官犯天禁夫天儀及復就責而罪之不原其力所不及人之所不及比若一旦使君王步行百里恐其不能到而道止也人所不及正是此也故不擇選人而其事署其職則名為

愁人而危其國也則名為亂治政敗也夫天地極神且明尚不敢奪人所欲為奪之則為大凶歲也何況人哉真人寧解迷曉耶唯唯誠得隨其國以師書授之因就其俗示之曉之解之行子可謂曉事之生天不奪人願也子行正自得天命年日益增何有窮已子學不求居世尊榮何復求索得天意而增年今已告子子今寧能說不耶然其受恩大喜無復有所恨但恐力極行以師文授教恐不能一旦而遍也何必一旦而遍但為之不止自舟流不久唯唯受嚴勅不敢雖繩墨子已知其意吾無復以戒子也行辭小竟事畢異日有疑乃復來唯唯

署置官得失文

太平經卷之九十八

太平經卷之九十九同卷  
乘雲駕龍圖第一百六十二  
訓七



